



Број/Број: **03/1-50-14-7-19/13**  
Сарајево/Sarajevo, 24. 1. 2013.

**PREDMET: Informacija o posjeti Zajedničke komisije za odbranu i sigurnost BiH  
Direkciji za koordinaciju policijskih tijela u BiH, 28. 11. 2012.**

U skladu s Planom rada za 2012. godinu, te zaključcima usvojenim na 17. sjednici, Zajednička komisija za odbranu i sigurnost BiH posjetila je 28. 11. 2012. Direkciju za koordinaciju policijskih tijela BiH, tokom koje je zajedno s rukovodstvom Direkcije obišla njeno sjedište i Sektor za osiguranje VIP osoba i objekata u sklopu policijske akademije na Vracama.

U ime Zajedničke komisije u radnoj posjeti su učestvovali: Dušanka Majkić, predsjedavajuća, Nermina Zaimović – Uzunović, Krunoslav Vrdoljak i Mehmed Bradarić, članovi Zajedničke komisije, Ljiljana Milićević, sekretar, Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

U ime Direkcije za koordinaciju policijskih tijela, članove Zajedničke komisije primili su: Himzo Selimović, direktor, te Mile Jurić i Uroš Pena, zamjenici direktora Direkcije.

U ime Misije OSCE-a u BiH u radnoj posjeti učestvovala je Jasna Dragičević.

Cilj ove posjete bio je da se Komisija u direktnom razgovoru s menadžmentom Direkcije upozna s njenim dosadašnjim aktivnostima i rezultatima, kao i s problemima s kojima se ova institucija susreće u svakodnevnom radu, te načinima na koje Zajednička komisija za odbranu i sigurnost BiH može Direkciji pružiti pomoć u rješavanju ovih problema.

**Dušanka Majkić, predsjedavajuća Zajedničke komisije za odbranu i sigurnost BiH,** navela je da je Zajednička komisija na radionicama održanim u Tesliću u septembru 2011. i novembru 2012. godine, kao i na 17. sjednici Zajedničke komisije, bila u prilici čuti probleme s kojima se Direkcija za koordinaciju policijskih tijela susreće u svom radu. Tom prilikom izrazila je nezadovoljstvo dinamikom rješavanja postavljenih ciljeva i stvaranja elementarnih preduslova za rad ove institucije, s obzirom da se Direkcija u nekoliko navrata obraćala Ministarstvu sigurnosti BiH i Vijeću ministara BiH, tražeći od njih pomoć u rješavanju problema s kojima se svakodnevno suočava.

Predsjedavajuća je navela da javnost u BiH nema jasno izgrađenu sliku o nadležnostima Direkcije i njenom dosadašnjem radu. Zaključila je da ubuduće mora postojati bolja koordinacija između direktora policijskih agencija u BiH s ministrom sigurnosti BiH, s ciljem efikasnog rješavanja nagomilanih problema s kojima se ova zemlja susreće u sigurnosnom sektoru, a prije svega u budućoj prevenciji i borbi protiv najtežih oblika krivičnih djela, u prvom redu terorizma i organiziranog kriminala.

**Himzo Selimović, direktor Direkcije za koordinaciju policijskih tijela u BiH**, zahvalio se članovima Zajedničke komisije na posjeti, navodeći da ona predstavlja kontinuitet u podršci koju ova komisija pruža radu Direkcije za koordinaciju policijskih tijela BiH. Kao primarni problem s kojim se Direkcija u svom radu susreće naveo je prije svega dosadašnje nerješavanje pitanja osiguranja njenog trajnog smještaja, te naveo da je centrala Direkcije sada smještena na tri različite lokacije u Sarajevu. Naveo je da je o ovom pitanju u nekoliko navrata upoznao predsjedavajućeg Vijeća ministara BiH i njegove zamjenike, te ministra sigurnosti BiH, navodeći im pri tome i jasne prijedloge za rješavanje ovog pitanja. Još je naglasio da jačanje kadrovske strukture i materijalno-tehničkih kapaciteta za svakodnevni rad Direkcije predstavljaju pitanja koja su definirana kao prioritetna, s ciljem efikasnog funkcioniranja ove institucije.

Direktor je izrazio nadu da će novoimenovani ministar sigurnosti BiH u skorije vrijeme pred Vijećem ministara BiH pokrenuti pitanja rješavanja funkcioniranja Direkcije, koja se ogledaju u neusklađenosti Zakona o direkciji za koordinaciju policijskih tijela sa Zakonom o plaćama i naknadama u institucijama BiH, te neusvajanju Pravilnika o policijskoj znački i Pravilnika o izgledu policijske uniforme.

Naglasio je i da je Direkcija u proteklom periodu Ministarstvu sigurnosti BiH, između ostalog, uputila i Odluku o određivanju osoba i objekata koji se posebno štite, kao i izmjenju Uputstva o načinu vršenja poslova fizičkog i tehničkog osiguranja.

Direktor je, također, informirao članove Zajedničke komisije da će s ciljem budžetskih ušteda u narednom periodu inicirati smanjenje broja izvršilaca na osiguranju DKP mreže u BiH.

Zajednička komisija je u okviru posjete obišla i Sektor za osiguranje VIP osoba i objekata, koji se nalazi u sklopu kompleksa policijske akademije na Vracama, prilikom čega se i direktno uvjerila u loše stanje objekata u kojima rade pripadnici ovog sektora Direkcije za koordinaciju policijskih tijela u BiH.

**PREDSJEDAVAJUĆA KOMISIJE**

**Dušanka Majkić**

Dostavljeno:

- naslovu
- a/a